

E Sinfonie

Chumm säg doch eifach wis dir würklech geit
u dass es um di grad nid so rosig steit
hesch wiedereinisch gäbig investiert
höch pokeret u zviu riskiert

Ds Abetüür hesch gsuecht u ziemlich ungestüm,
hesch di verirrt u fingsch di säuber nümme
u jitz chunsch hinger u vore nümme drus,
u hesch dr Blues

**Ds Läbe isch e Sinfonie in Moll u Dur
wär isch dr Dirigänt u Macher vo dr Partitur
mau git's e Melodie wo ds Ohr verwöhnt
u de wieder öppis wo nid eso agnähm tönt
... e Sinfonie mau Moll, mau Dur
wär isch dr Komponischt u Dirigänt vor Partitur
mau git's e Melodie wo ds Ohr verwöhnt
u de wieder öppis wo nid eso agnähm tönt**

Hesch dir wiedereinisch öppis vorgmacht hie
di säuber glingget, wi scho öppe die
u chli vergässe, dass es no es Gägenüber git
wo nid eifach eso iverstangen isch dermit

Aus gäbs nüt angers, hesch di fokussiert
u dr Verstand het nümme funktioniert
hesch di verboge u verlore ir Sach
u jitz ligsch flach

**Ds Läbe isch e Sinfonie in Moll u Dur
du bisch dr Dirigänt u Macher vo dr Partitur
mau git's e Melodie wo ds Ohr verwöhnt
u de wieder öppis wo nid eso agnähm tönt
... e Sinfonie mau Moll, mau Dur
du bisch dr Komponischt u Dirigänt vor Partitur
mau git's e Melodie wo ds Ohr verwöhnt
u de wieder öppis wo nid eso agnähm tönt**

**... ds Läbe isch e Sinfonie
mau Moll mau Dur!**